



ILIDŽA

INFORMATIVNI BILTEN OPĆINE ILIDŽA
Ilidža ● Januar 2014. ● Broj 123



2014.

ZIMA NA ILIDŽI



2012.



REDOVNA SJEDNICA OPĆINSKOG VIJEĆA

Odluka o pristupanju izradi Regulacionog plana „Stup Nukleus“

Na osnovu Zakona o prostornom uređenju Vijeće je na svojoj 13. redovnoj sjednici održanoj 30. januara 2014. godine donijelo Odluku o pristupanju izradi Regulacionog plana „Stup Nukleus“. Plan se radi na osnovu inicijative Općine Ilidža pokrenute u cilju razmatranja i rješavanja konkretnih i argumentovanih primjedbi po postupku javne rasprave poštujući osjetljivost prostora kao i kontaktnih zona kolektivne i individualne izgradnje i zahtjeva potencijalnih investitora da u prostornom obuhvatu Plana mogu realizovati izgradnju stambenih, stambeno-poslovnih, poslovno-stambenih i poslovnih objekata većih fizičkih struktura. Dio planiranih sadržaja je već realiziran, s tim što je na zemljištu na pretežnom dijelu Plana izvršena promjena vlasništva, bilo privatizacijom ili prometom. To je prouzrokovalo i promjenu potreba u programima razvoja pojedinih subjekata, što bi ovaj prostor pretvorilo u modernu stambeno-poslovnu zonu koja čini kontinuitet u razvoju grada. Prilikom izrade Plana treba uvažavati, po mogućnosti, postojeće vlasničko stanje, što će omogućiti lakšu realizaciju planiranja gradnje. Kroz izradu koncepta prostorne organizacije preispitati programe koje su ponudili investitori radi inkorporiranja u kompletnu prostornu organizaciju što podrazumijeva i mogućnost promjena koje se odnose na građevinske linije, spratnost, pristup parceli i objektu, saobraćaj u mirovanju, zelenilo i ostalo. Izgradnja svih subjekata mora biti usaglašena sa prostornim mogućnostima, te je potrebno voditi računa o rastojanjima između objekata, njihovom osunčanju, saobraćajnom i kolskom pristupu, saobraćaju u mirovanju i minimalnim distancama između objekata u odnosu na spratnost. Također će se razmotriti i mogućnost reurbanizacije individualne gradnje i shodno zahtjevima vlasnika planirati kolektivnu gradnju. Za planirani broj stanovnika u obuhvatu treba obezbijediti društvene i komercijalne sadržaje, predvidjeti kapacitete za školske, predškolske i zdravstvene ustanove, sadržaje kulture i druge sadržaje društvene infrastrukture. Prilikom definisanja prostorne organizacije cjelokupnog prostora, potrebno je u potpunosti sačuvati pos-



tojeće zelene površine i predložiti unaprijeđenje njihove strukture. Nosilac izrade Plana je Zavod za planiranje razvoja Kantona Sarajevo, a subjekti planiranja su: Kanton Sarajevo, Općina Ilidža, Zavod za izgradnju Kantona Sarajevo, komunalna i javna komunalna preduzeća, vlasnici i korisnici zemljišta, potencijalni investitori i drugi zainteresovani subjekti koji iskažu svoj interes. Vijeće je u okviru ove tačke donijelo i zaključke da se obuhvat Regulacionog plana „Stup Nukleus“ proširi u dijelu mjesne zajednice Stupsko brdo (prostor iza hotela Radon Plaza i razrušenog Doma penzionera) i da se ubrza procedura donošenja Regulacionog plana.

Javni poziv za predlaganje kandidata za dodjelu priznanja Općine Ilidža

Na osnovu Odluke o priznanjima Općine Ilidža, Općinsko vijeće donijelo je Odluku o raspisivanju Javnog poziva za predlaganje kandidata za dodjelu priznanja Općine Ilidža i to: Zlatna i Srebrena plaketa i Zahvalnica Općine Ilidža. Priznanja Općine Ilidža dodjeljuju se pojedincima i kolektivima sa područja općine Ilidža za izuzetne uspjehe u razvoju privrednih i društvenih djelatnosti, kao i značajan doprinos u odbrani općine. Izuzetno, priznanja se mogu dodijeliti pojedincima i kolektivima koji nisu sa područja općine Ilidža, ako su njihovi rezultati primjereni ugledu općine. Priznanja se mogu dodjeljivati i posthumno. Prijedloge za dodjelu priznanja mogu podnositi građani pojedinci, udruženja građana, savjeti mjesnih zajednica, boračke organizacije i udruženja, političke partije, vijećnici Općinskog vijeća Ilidža, općinski načelnik, ustanove i drugi organi i organizacije sa područja općine Ilidža. Priznanja se ne mogu dodijeliti uposlenicima Općine Ilidža za rezultate ostvarene u obavljanju poslova predviđenih opisom radnog mjesta, vijećnicima Općinskog vijeća Ilidža i članovima Savjeta mjesnih zajednica u vrijeme trajanja mandata, kao i kolektivima ili pojedincima kojim su ista dodijeljena u posljednjih pet godina. Prijedlozi za dodjelu priznanja podnose se u pisanoj formi sa obrazloženjem i relevantnom dokumentacijom sa naznakom za koju vrstu priznanja se podnosi prijedlog. Svaki prijedlog za dodjelu priznanja mora biti obrazložen i dokumentovan.

Imenovan novi članovi Etičke komisije i Komisije za za prostorno planiranje, mjesne zajednice, komunalne poslove i ekologiju

Općinsko vijeće je donijelo Rješenje o imenovanju Osmana Đuderije (SDA) za člana Etičke komisije Općinskog vijeća Ilidža (predstavnik civilnog društva), umjesto preminulog Fadila Hubijara. Vijeće je donijelo i Rješenje o razrješenju Minele Muzur sa dužnosti člana Komisije Općinskog vijeća Ilidža za prostorno planiranje, mjesne zajednice, komunalne poslove i ekologiju na lični zahtjev, a u istu za člana imenovalo Vahida Ibrahimovića (NDS).



REDOVNA SJEDNICA OPĆINSKOG VIJEĆA

Informacija o uslovima i korištenju prostorija MZ

Informacija o uslovima i korištenju prostorija MZ na području općine Iliža za 2013. godinu bila je jedna od tačaka dnevnog reda 13.redovne sjednice.

Nakon donesene Odluke o dodjeli na upravljanje i korištenje domova kulture u MZ, izdavanje poslovnih prostorija mjesnih zajednica, kako stoji u Informaciji, vrši nadležna općinska služba, ali sredstva obezbijeđena na ovaj način ne pripadaju MZ, već je to prihod Općine Ilidža.

U 2013. godini podneseno je 210 zahtjeva za izdavanje prostorija. Na osnovu saglasnosti Savjeta MZ izdato je 196 odobrenja, te 14 odbijenica. Četrnaest zahtjeva je odbijeno iz razloga što, su podneseni za termine koji su već ranije zauzeti, zbog popisa stanovništva, registracije udruženja na drugoj općini i dr., što nije regulisano Odlukom o korištenju prostorija Mjesnih zajednica.

Plan i program održavanja, zaštite i rekonstrukcije cesta

Općinsko vijeće je na 13. redovnoj sjednici usvojilo i Plan i Program održavanja, zaštite, rekonstrukcije i izgradnje lokalnih i nerazvrstanih cesta na području općine Ilidža za 2014., uz zahtjev da Služba za razvoj, investicije i komunalne poslove, prilikom izrade Plana i programa za 2015. godinu izmjeni formu, tako da se ubuduće dodaju i podaci kilometraže, iznos predviđenih sredstava iz budžeta, naznačeni prioriteti i paralelni pokazatelji u odnosu na predhodni period i to posebno na zimsko, a posebno za ljetno održavanje. Planirano održavanje zaštite, rekonstrukcije i izgradnje lokalnih i nerazvrstanih cesta bazirano je na realnim potrebama normalnog funkcionisanja saobraćaja na konsultacijama i prijedlozima organa MZ i finansijskim mogućnostima Općine iskazanim kroz budžet 2014. godine. Ciljevi ovog programa bit će: sprječavanje propadanja cesta, omogućavanje sigurnog prometa, smanjenje troškova korisnika dobrim stanjem cesta, kao i dovođenje cesta u projektovano stanje uzimajući u obzir izmjenjene potrebe prometa. Budžetom za 2014. godinu planirana su sredstva za održavanje lokalnih i nekategorisanih cesta i gradskih ulica u iznosu od 200.000 KM. Općinsko vijeće zahtjeva da Savjeti MZ za naredni zimski period dostave prijedloge saobraćajnica za održavanje u zimskom periodu, a da Služba za razvoj investicije i komunalne poslove dostavi okvirnu kilometražu sa kojom raspolaže i na osnovu toga sačini konačni Plan i Program održavanja, zaštite, rekonstrukcije i izgradnje lokalnih i nerazvrstanih cesta na području općine Ilidža za 2015. godinu.

Traži se hitan sastanak sa nadležnim iz KJKP“ Vodovod i kanalizacija“

Općina Ilidža kao lokalna zajednica izražava svoje nezadovoljstvo radom, funkcionisanjem i pružanjem usluga KJKP „Vodovod i kanalizacija“ na području ove općine i tražo hitno organiziranje zajedničkog sastanka općinskog načelnika, predstavnika Općinskog vijeća, nadležnih službi sa predstavnicima KJKP „Vodovod i kanalizacija“, Vlade Kantona Sarajevo, odnosno Ministarstva prostornog uređenja i zaštite okoliša i Skupštine Kantona, a u cilju poboljšanja usluga građanima općine Ilidža, jedan je od zaključaka Općinskog vijeća na 13. redovnoj sjednici.

Laptope dobilo 27 vijećnika

Na posljednjoj sjednici, 27 vijećnika dobilo je laptope, koji će im pomoći da lakše rade i komuniciraju sa općinskim službama.

Projekat pod nazivom e-vijeće predstavljat će novi pristup u radu Općinskog vijeća. Uvođenjem ovog sistema rad bi trebao biti efikasniji i transparentniji. Ovo je prva faza i za nju je izdvojeno 40.000 KM

Informacija o praćenju stanja ugroženosti od poplava na svim rizičnim područjima

Na osnovu zaključka Općinskog vijeća Služba civilne zaštite obavezna je svake sjednice informisati vijećnike o stanju ugroženosti od poplava na svim rizičnim područjima.

Usljed padavina 20. i 21. januara 2014. godine došlo je povećanja nivoa vodostaja svih vodotoka na području općine, ali nije došlo do izlivanja rijeka iz korita i ugrožavanja stanovništva i materijalnih dobara.

Prema informaciji Službe za razvoj, investicije i komunalne poslove uslijed povećanja vodotoka došlo je do zaustavljanja započetih radova na regulaciji dijela obale Zujevine (lokalitet „Bosanka“ Blažuj) u dužini 150 metara i Dobrinje (lokalitet TC „Interex“) u dužini od 100 metara. Služba civilne zaštite će i dalje pratiti stanje svih vodotoka i poduzimati mjere zaštite i spašavanja iz svoje nadležnosti, navodi se u Informaciji.



Predstavници četiri sarajevske općine posjetili roditelje djece iz Konjević-Polja

Načelnici općina Ilidža prof. dr. Senaid Memić, Novi Grad Sarajevo mr. Semir Efendić, Novo Sarajevo Nedžad Koldžo i dopredsjedavajući Općinskog vijeća Centar Nedžad Ajnadžić posjetili su 24. januara roditelje djece iz Konjević-Polja, koji više od tri mjeseca borave ispred zgrade OHR-a u Sarajevu traže pravo da njihova djeca u školi uče maternji - bosanski jezik.

Predstavnici četiri sarajevske općine iskazali su spremnost da ovim ljudima pruže materijalnu podršku, a razgovarano je o mogućnosti da općine izvrše nabavku kombija za prijevoz učenika, bez obzira na to da li će oni pohađati instruktivnu nastavu ili će ići u svoju školu, jer su neka djeca pješačila i po deset kilometara do mjesne škole, što je bilo izuzetno teško u zimskom periodu. Načelnik Općine Ilidža prof. dr. Senaid Memić, tokom posjete kazao je da problem u Bratuncu ne smije biti problem Bratunčana, nego cijele države Bosne i Hercegovine.

„Dužni smo da im pomognemo i to ćemo učiniti onoliko koliko je u našoj mogućnosti. Ako nema prava za ljude, onda nema ni slobode. Ako roditelji djeci ne obezbijede slobodu, onda ona neće imati budućnost. Ako mi ne vidimo ovu nevolju i ako im ne pomognemo, onda možemo isti problem očekivati u svom dvorištu“, naglasio je Memić.

„Roditelji djece iz Konjević-Polja borave u našem gradu i odlučili smo da im pružimo svu potrebnu podršku. Njihova prava, kao i prava djece iz Vrbanjaca kod Kotor-Varoši su važnija od pitanja „Sejdić- Finci“ o kojem se u zadnje vrijeme mnogo govori. Ovdje se radi o elementarnim ljudskim pravima, pravima djece da uče maternji jezik u svojim kućama, u kućama u kojima su se rodili njihovi pradjedovi. Njima je to pravo uskarčeno i mislim da je ono važnije od prava nekoga da bude kandidiran u Predsjedništvo BiH, što je u odnosu na prob-



leme koje ovi ljudi imaju ipak luksuz“ kazao je načelnik Općine Novi Grad Efendić. Prema riječima načelnika Općine Novo Sarajevo Nedžada Koldže ohrabruje činjenica da ovi roditelji nisu sami, jer su ih na njihovom putu do ostvarivanja osnovnih ljudskih prava podržali i drugi nivoi vlasti.

Predstavnik roditelja djece iz Konjević-Polja Muhizin Omerović kazao je da će istrajati u svojoj borbi.


„Advokat je predao tužbe protiv područne škole „Petar Kočić“ i Ministarstva prosvjete i kulture Republike Srpske. Bez obzira na to kakav će ishod biti, roditelji su spremni ići do Strazbura tražeći pravdu, kako za svoju djecu, tako i za svu djecu u BiH, jer je jasno da to nije slučaj samo u Konjević-Polju i Vrbanjcima. Diskriminacija se vrši u više od 20 škola u BiH.

„Načelnici općina koji su nas danas posjetili i dosada su nas pomagali i bili uz nas od samog početka i zahvalni smo im na tome. Bez obzira na to šta će se u budućnosti desiti, mi nećemo prekinuti našu borbu do ostvarivanja naših prava“, istakao je Omerovića.

Uručeni ključevi za 27 stambenih objekata povratnika

U prostorijama Općine Ilidža, 28. januara 2014. godine svečano su uručeni ključevi rekonstruisanih stambenih jedinica za korisnike projekta ZPO9. Ovim projektom koji je finansiran od strane Ministarstva za ljudska prava i izbjeglice BiH i Fonda za povratak BiH u iznosu od 320.000 KM obuhvaćena je obnova 27 stambenih objekata povratnika, raseljenih i izbjeglih lica (19 srpske i 8 bošnjačke nacionalnosti) koji su do rata imali prebivalište na području općine Ilidža. „Ovom prilikom želim da vam čestitam što ste dočekali da se vratite u svoje kuće ili stanove u svoju općinu. Ovo su lijepi trenutci u ovim teškim vremenima i ne treba da se dijelimo po nacionalnosti jer svi smo mi stanovnici Ilidže i teba da imamo povjerenja jedni u druge,“ kazao je u svom obraćanju povratnicima načelnik Općine Ilidža prof. dr. Senaid Memić. Dobivanjem ključeva i potpisivanje potvrde o završetku radova korisnici obnovljenih stambenih jedinica u vlasništvu ili nosioci stanarskog prava obavezni su da se vrate u obnovljene objekte u roku od 30 dana zajedno sa svojim članovima domaćinstava. Ključeve su dobili: Čedomir Kovačević, Milovan Urta, Daliborka Ateljević, Milan Tomanić, Mirko Vuković, Zorica Kraljević, Todo Đajić, Zagorka Kapetina, Janja Bošnjak, Borislav Babić, Živko Tošić, Slavojka Ratković, Milan Lalović, Milica Stjepanović, Vesna Stojanović, Nikola Samardžić, Jelica Miličević, Novo Cerovina, Miloš Vujičić, Samija Selimbegović, Jasmina Bajraktarević, Džemal Pejdah, Samija Salković, Nihada Srna, Memsura Radončić, Murat Tvico i Selima Stambolić.





Riješeno 6.597 zahtjeva za naknadnu urbanističku saglasnost

Bespravna gradnja je problem Kantona Sarajevo, pa tako i Općine Ilidža. Naša lokalna zajednica čini sve napore kako bi životno važno pitanje za naše građane, a tiče se legalizacije objekata što efikasnije pozitivno rješila. Općini Ilidža, odnosno Službi za prostorno uređenje je od 2006. godine na osnovu Odluke o legalizaciji bespravno izgrađenih objekata i objekata privremenog karaktera do 31. decembra 2012. godine podnešeno 10.423 zahtjeva za naknadnu urbanističku saglasnost. Od tog broja do 31. decembra 2013. godine riješeno je 6.597 zahtjeva.

„Odluka o legalizaciji bespravno izgrađenih objekata i objekata privremenog karaktera podrazumjeva tri upravna postupka i to izdavanje naknadne urbanističke, građevinske i upotrebne dozvole“ pojasnila je pomoćnica načelnika za prostorno uređenje Jasmina Pepić.

Prema riječima Jasmine Pepić za naknadno odobrenje za gradnju, a na osnovu izdatih urbanističkih saglasnosti podneseno je 1.978 zahtjeva. Od tog broja do 31. decembra 2013. godine riješeno je 1.722.

„Faktori koji utiču na rad službe, odnosno na postupak rješavanja legalizacije su različiti i jedan je nekompletna dokumentacija kod podnošenja zahtjeva, koja traži vrijeme da stranka prikupi dokumentaciju. U velikom broju legalizaciju otežava pitanje vlasništva zemljišta, postojanje određenih sporova, sporovi sa susjedima i slični problemi imovinsko-pravne prirode, te nemogućnost podnosioca zahtjeva da plati troškove za posebne naknade za legalizaciju. Jedan od otežavajućih faktora je prostorno planska dokumentacija. Želim da naglasim da je u toku izmjena i dopuna prostornog plana B- faze Kantona Sarajevo gdje očekujemo da će se za određene lokalitete stvoriti uslovi za pozitivno rješavanje,“ naglasila je pomoćnica načelnika Pepić.

Inače, posebna specifičnost općine Ilidža je prostor vodozaštitne zone.

„U proceduri je donošenje odluke o zonama sanitarne zaštite izvorište vode za piće Sarajevsko polje koja će uticati na rješavanje podnesenih zahtjeva iz ovog područja“ dodala je pomoćnica načelnika za prostorno uređenje.

Općinski načelnik je uz podršku Općinskog vijeća pokrenuo proceduru za izradu provedbeno planske dokumentacije za određena područja.

„U različitim fazama je i izrada deset regulacionih planova na području općine, koje finansira Općina Ilidža“ istakla je Pepić.

Samo za jednokratne novčane pomoći dato 410.000 KM

Pravo na redovni dječji dodatak mogu ostvariti porodice čija ukupna primanja po članu domaćinstva ne prelaze iznos od 120,00 KM i u kojim niko od članova zajedničkog domaćinstva nije vlasnik preduzeća ili samostalne radnje ili ima registriranu dopunsku djelatnost, vlasnik je ili posjednik motornog vozila, osim ako su u pitanju osobe sa invaliditetom koje po propisima iz oblasti poreske i carinske politike mogu uvesti ili na domaćem tržištu kupiti motorno vozilo kao ortopedsko ili drugo pomagalo.

Putem Službe za rad, socijalna pitanja, zdravstvo i izbjegla i raseljena lica priznato je pravo na jednokratnu opremu za 232 novorođena djeteta.

„U periodu od 1. januara pa do decembra 2013. godine, Služba je priznala pravo na naknadu umjesto plaće ženimajci u radnom odnosu za vrijeme dok odsustvuje sa posla radi porođaja 317, a za 360 majki priznato je pravo na novčanu pomoć za vrijeme porođaja koja nije u radnom odnosu“ kazala nam je Sejda Topalović, resorna pomoćnica načelnika.

Putem ove službe pravo na zdravstvenu zaštitu djece do 15 godina ostvarilo je 37 novih (1.1-31.12.) a u toku 2013. to pravo iskoristilo je ukupno 260, dok u stanju socijalne potrebe 66. Devetero je koristilo pravo na subvenciju dijela troškova boravka djece u predškolskim ustanovama“, dodala je Topalović.

„U toku 2013. godine iz budžeta za jednokratne novčane pomoći isplaćeno je 410.000 KM“ rekla je Topalović.





Prijem za najstarije Ilidžance

U Općini Ilidža 31. januara 2014. upriličen je prijem za najstarije građane ove općine. Predsjedavajuća i dopredsjedavajući Općinskog vijeća Ilidža, Smiljana Viteškić i Suljo Alić i šef Službe za koordinaciju rada MZ Enes Čorbo primili su 21 Ilidžanca, koji imaju više od 80 godina. Tom prilikom uručili su simboličnu novčanu pomoć u iznosu od 50 KM.

„Izuzetna je čast danas biti sa vama. Mi cijenimo ono što ste vi uradili u toku svog radnog vijeka za razvoj naše lokalne zajednice. Načelnik Općine Ilidža prof. dr. Senaid Memić koji je organizovao ovaj prijem izrazio je svoje žaljenje što nije mogao biti tu, jer je morao na službeni put, a kako je rekao susret s vama je jedan od najdražih. Želim vam još puno godina da se susrećemo i ovaj mali gest samo je potvrda da niste zaboravljeni“ rekla je, između ostalog Smiljana Viteškić, predsjedavajuća Općinskog vijeća.

„Općinsko vijeće kao kolektiv i vijećnici kao pojedinci uvijek će imati puni osjećaj lične i društvene odgovornosti prema vama, vi ste ti koji ste kroz svoj životni vijek doprinjeli razvoju naše lokalne zajednice i na različite načine stvorili temelje jedne moderne, demokratski prosperitetne općine. Veličina i humanost jedne lokalne zajednice se upravo vidi kroz brigu o onima koji su svoj životni vijek posvetili radu i stvaranju. Mi vas doživljavamo i dalje kao aktivne članove našeg društva, a i dalje ćemo vrednovati činjenice da bez vašeg rada i doprinosa općina ne bi bila onakva kakva je danas“ izjavio je Suljo Alić, dopredsjedavajući Općinskog vijeća. Svih 1.430 stanovnika starijih iznad 80 godina dobit će na adresu po 50 KM.

Prijemu su prisustvovala i pomoćnice načelnika Sejda Topalović i Azra Stambolić koje su im zaželele svako dobro i mnogo zdravlja.

Načelnik upriličio prijem za predsjednike savjeta MZ

Načelnik Općine Ilidža prof. dr. Senaid Memić upriličio je 13. januara 2013. godine u sali Općine Ilidža prijem za 16 predsjednika Savjeta MZ.

Načelnik Memić kazao je da je za svaku lokalnu vlast od izuzetnog značaja dobra saradnja sa predsjednicima savjeta mjesnih zajednica i da su oni i spona između vlasti i građana.

„Realizovali smo više projekata u svakoj od 16 mjesnih zajednica, a bez angažovanosti i rada predsjednika savjeta, koji je za svaku pohvalu, ti bi se projekti vrlo teško realizovali. Zajedno mi možemo učiniti mnogo, a imamo isti cilj pomoći našim građanima, rekao je između ostalog, načelnik Memić.

Predsjednici savjeta Mz bili su jednoglasni, podržavat će načelnika u njegovim aktivnostima u 2014. godini.

„Načelnik Memić je pravi čovjek na pravom mjestu. On razumije rad MZ i potrebe građana. Učestvuje na svim javnim raspravama koje organizuje MZ, a kad je riječ o budžetu uvijek ga kreira zajedno s građanima i poštuje zahtjeve građana iznesene na zborovima“ ocijenili su predsjednici Savjeta MZ na tradicionalnom prijemu u općini Ilidža.



Općina finansira prijevoz za 308 učenika

Općina Ilidža je u skladu sa Sporazumom o prijevozu učenika Ministarstva za obrazovanje, nauku i mlade Kantona Sarajevo i općine, osigurala sredstva u iznosu od 17.000 KM za prijevoz 48 učenika osnovnih i srednjih škola, koji imaju smetnje u kretanju u drugom polugodištu školske 2013/2014. godine i 10 pratioca roditelja/staratelja (kuponi i gorivo). Također, osigurane su i užine za 16 učenika Centra “Vladimir Nazor” Sarajevo.

Korisnici odobrenog prijevoza su učenici Centra “Vladimir Nazor” Sarajevo, Škole za srednje stručno obra-

zovanje i radno osposobljavanje Sarajevo, Centra za slušnu i govornu rehabilitaciju Sarajevo, Centra za slijepu i slabovidnu djecu i omladinu Sarajevo, Zavoda “Mjedonica” Sarajevo, Prve i Četvrte osnovne škole Ilidža, Osnovne škole “Aleksa Šantić” te Gimnazije Dobrinja.

Roditelji/staratelji učenika, škole, centri i zavodi podnose zahtjeve za prijevoz učenika putem Općine, a obrazac se može preuzeti u Centru za pružanje usluga građanima Općine Ilidža i na web stranici općine.

Općina Ilidža finansira i prijevoz 250 učenika JU Prve osnovne škole Ilidža sa područja MZ Stup II i Stupsko brdo (Kasindolska). Za ove namjene Općina je obezbijedila je 40.000 KM, godišnje.



Uručeni ugovori o stipendiranju talentovanih studenata i učenika

Općinsko vijeće Ilidža donijelo je Odluku o stipendiranju talentovanih učenika i studenata u školskoj 2013/2014. godini. Mjesečni iznos stipendije za učenike i studente prve godine je 78 KM, a za studente (druge-šeste godine) kreće se u rasponu od 96 do 120 KM zavisno od postignutog rezultata u prethodnoj godini. Stipendije će se dodjeljivati deset mjeseci. Kriterije konkursa zadovoljila su 243 kandidata, od toga 80 učenika i 163 studenta.

Na 12. redovnoj sjednici vijećnici su donijeli i Odluku o stipendiranju djece bez oba roditelja i djece bez roditeljskog staranja. Stipendirat će se 46, od toga 21 student, 8 učenika srednjih škola, te 17 učenika osnovnih škola. Učenicima osnovnih i srednjih škola dodjeljivat će se po 75 KM a po 100 KM studentima.

Načelnik Općine Ilidža prof. dr. Senaid Memić, 9. januara u sali Općine (Butmirska cesta 12) uručio je Ugovore o stipendiranju talentovanih učenika i studenata i djeci bez roditeljskog staranja. „Vi ste najbolji među najboljima. Ova nagrada pripada samo vama za trud i odricanja koja vi svakodnevno imate. Općina Ilidža i dalje će podržavati ovakve učenike i studente i ponositi se sa njima“, kazao je između ostalog, načelnik Memić.

„Ova stipendija mi mnogo znači jer sam uložila mnogo truda učeći. Hvala Općini Ilidži koja je prepoznala to i nagradila“, rekla nam je Ajdina Memišević, odlična učenica trećeg razreda, jedna od dobitnica stipendije.

Nova stolarija na Prvoj osnovnoj školi

Na objektu Prve osnovne škole na Ilidži u toku je zamjena dotrajale stolarije. Općina Ilidža je izdvojila 60.000 KM za ugradnju 32 otvora za 16 kabineta i ulazna vrata. Stara stolarija na školi je montirana 1957. godine i od tada nije zamijenjena. Načelnik Općine Ilidža i Općinsko vijeće Ilidža pokazali su veliko razumjevanje za ovaj problem i učenici će proleće dočekati u mnogo bezbjednijim i kvalitetnijim uslovima.



Javna tribina RP „Blažuj“

Općinski načelnik uputio je osnovnu koncepciju Regulacionog plana „Blažuj“ u MZ Blažuj na uvid svim zainteresovanim subjektima.

U prostorijama MZ Blažuj (ul. Vlakovo br. 102 B) bit će održana javna tribina 13. februara u 17,00 sati.

Pozivaju se svi zainteresovani subjekti da izvrše uvid u ponuđeni materijal, te uzmu učešće u pripremi Regulacionog plana Blažuj.

Učenici Devete osnovne škole očistili školsko dvorište

U sklopu predmeta „Građansko obrazovanje“ učenici Devete osnovne škole iz Rakovice zajedno s nastavnikom Enisom Bajramović rade na projektu „Recikliranje plastičnih flaša“

„Osnovna ideja ekološkog projekta u našoj školi je da se učenici educiraju o otpadu, recikliranju, a ujedno da se probudi ekološka svijest učenika. Đaci su očistili školsko dvorište od plastičnih flaša i naučili sortirati pet ambalaža. Novac od prodaje plastičnih boca iskoristit će se za uređenje dvorišta“ rekli su nam iz škole.





Sajam pčelarstva na Ilidži

U centru Ilidže u ulici Rustempašina od 20. do 24. januara 2014. godine održan je Sajam pčelarstva. Svoje proizvode predstavilo je 70 izlagača iz Kantona Sarajevo.

„Želja nam je da Sajam pospješi organizirano bavljenje pčelarstvom na prostoru Kantona Sarajevo i utječe na podizanje svijesti o potrebi većeg konzumiranja meda i pčelinjih preparata, a ujedno i da naši građani spoznaju

da nema potrebe da traže ove proizvode iz drugih kantona i ovdje su najbolji“ tvrdi Admir Halilović, predsjednik Društva pčelara KS, koje je i organizator ovog sajma.

Također, na ovom sajmu svoje proizvode predstavilo je i deset izlagača sa Ilidže, u organizaciji Udruženju pčelara „Behar“. Na ovom sajmu građani Ilidže mogli su kupiti domaći med i pčelinje proizvode, tahan halvu, eterična ulja, čajevе i heljdine proizvode.

Borba protiv trgovine ljudima aktuelna je i među mladima

Institut za razvoj mladih KULT je 7. januara 2014. g. u Spjalnici održao četvrtu po redu edukativnu radionicu o trgovini ljudima.

Radionici je prisustvovalo 11 polaznika/ca, koji su tokom rada prošli nekoliko tema koje se tiču trgovine ljudima. Osim toga, prikazani su i određeni konkretni primjeri iz stvarnog života, te načini borbe protiv ovog problema. Pokrovitelji projekta su Institut za razvoj mladih KULT, GIZ i Caritas.



Završeno deminiranje „Vrela Bosne-Bezistan Točila „

UMZ Vrelo Bosne 21. januara završeno je deminiranje projekta „Vrelo Bosne-Bezistan Točilo“. Deminirana je površina 17.963 kvadratna metra. Izvođač radova bila je firma DOK-ING Pale.

Sredstva za ovaj projekat obezbijedila je Općina Ilidža i EU.

U ovom području pronađeno je 17 protivpješadijskih mina i četiri NUS-a.





Obilježena 72. godišnjica Igmanskog marša

Povodom obilježavanja 72. godišnjice Igmanskog marša, u organizaciji UBNOR-a Općine Ilidža u znak sjećanja na žrtve ovog historijskog pohoda 25. januara 2014. godine položeno je cvijeće na spomenike u MZ Osjek, Vrelo Bosne kao i na Gubavcu u Blažuju. Prisutnima se obratio načelnik Općine Ilidža prof. dr. Senaid Memić, koji je pozdravio poštovaoce i sljedbenike antifašističkih tekovina iz država eks Jugoslavije.

„Pored ovog značajnog datuma ne zaboravite ni datume iz 1992. jer smo dužni prema žrtvama. Vrlo je bitno da se njeguje antifašizam kod mladih generacija. Želim vam uspješan marš, a evo proslavu Igmanskog marša na Velikom polju upotpunio je snijeg koji pada i koji daje pravo zimsko ozračje manifestaciji na Igmanu“ rekao je, između ostalog, načelnik Memić. Potom su se okupljeni uputili na Brezovaču, gdje je poslije kraćeg programa položeno cvijeće na spomenik NOR-a i spomen-obilježja iz prethodnog rata 1992-1995. godine, a položeno je cvijeće i na druga spomen-obilježja i mezarja. Ovim pohodom na planinu Igman na Velikom polju obilježena je 72. godišnjica Igmanskog marša, jedne od prijelomnih operacija partizanske vojske u toku narodnooslobodilačke borbe u Drugom svjetskom ratu. Igmanski marš izveden je u noći između 27. i 28. januara 1942. godine, po dubokom snijegu i velikoj hladnoći od minus 38 stupnjeva, a 800 pripadnika Prve proleterske brigade pješačilo je 17 sati. Pripadnici Prve proleterske brigade su na Romaniji bili opkoljeni jakim njemačkim snagama. Stožer brigade donio je odluku o izvršenju opasnog, ali jedino mogućeg pokreta. Sudionici marša prošli su pokraj



Sarajeva i preko Igmana izvršili pokret ka Foči, tadašnjoj slobodnoj teritoriji. Manifestacija je završena na Velikom polju, uz vojnički grah. Predsjednik UBNOR-a Ilidža Nikola Babić kazao je da je na obilježavanju ove ceremonije prisustvovalo oko 3.000 građana, dok je u samom Igmanskom maršu učestvovalo 1.600 osoba. Babić je zahvalio Općini Ilidža na pomoći, a ujedno i svim građanima koji su se pridružili ovom pohodu. Gosti iz drugih država, a posebno iz gradova Bajina bašta, Makarska i Užice su bili gosti UBNOR-a Ilidža i Hadžića i pored učešća na Igmanskom maršu, upoznali su ljepote Ilidže i Bašćaršije. Dogovorena je saradnje ovih udruženja.

Deminirani Matin do i Dolinica u MZ Rakovica

U mjesnoj zajednici Rakovica, 7. januara 2014. godine Udruženje za eliminaciju mina UEM Sarajevo izvršilo je primopredaju radova na tehničkom izvođenju-deminiranju lokacija Matin do i Dolinice. Deminirano je šumsko područje koje se nalazi četiri kilometra od glavnog puta u Rakovici u ukupnoj površini od 140 hiljada kvadratnih metara na kojem su pronađene 43 mine. Pronađene mine su bezbjedno uništene.

Projekat deminiranja je zajednički finansiran sredstvima Evropske unije i Općine Ilidža, koja je za ove namjene izdvojila 200.000 KM. Općina Ilidža će i dalje nastaviti sa deminiranjem preostalih lokacija u Rakovici, Vrelo Bosne i Krupcu.



Zimski raspust u Spajalici

Još jedna u nizu zanimljivih aktivnosti za polaznike Škole prijateljstva u Spajalici bila je posjeta kinu Cinema City. Mališani su išli gledati 3D crtani film "Dinosaurusi". Osim uživanja u crtanom, djeca su uživali i u šetnji po divnom i sunčanom danu u Sarajevu, vožnji tramvajem i druženju sa vršnjacima.

-Najveća nagrada za rad i trud su ti iskreni osmjesi na njihovim licima, kazali su nam iz Spajalice.



Odbojkašice Igmana prve na turniru u Zenici

Odbojkašice Igmana sa Ilidže osvojile su prvo mjesto na „Prvom sportzdk volleyball open turniru“ koji je odigran 11. januara 2014. godine u Zenici. Mlada i talentirana ekipa ŽOK „Igmán“ u finalu je bila bolja od ekipe

ŽOK „Breza 1934“ sa rezultatom 2:0 u setovima i tako postala prvi pobjednik ovog turnira.

Pored ekipa Igmana i Breze na turniru su učestvovala i ekipe ŽOK „Željezara“ iz Zenice, ŽOK „Žepče“, ŽOK „Kakanj“ i ŽOK „Maglaj“. Za najbolju igraticu turnira proglašena je Amna Dokara iz Igmana. Turnir su organizovali Udruženje „Sport Medija“ i Općina Zenica.

NK „Omladinac“ slavi 40 rođendan

Nogometni klub „Omladinac“ formiran je 28. aprila 1974. godine na inicijativu Savjeta MZ Stup. Aktivnosti oko formiranja Kluba vodili su aktivisti Stupa Žarko Tomić, Ivica Bajkuša, Stjepan Barić, Kosta Ešpek, Ferdo Bošnjak, Obro Berjan, Tomislav Barić, Alija Nukica, Stjepan Pocrnja, Nedo Radujko i drugi koji su dali nesebičan doprinos osnivanju Kluba.

Prve utakmice Klub je kao domaćin igrao u

Nedžarićima sve do 1978. godine. Zahvaljujući razumijevanju PD-a „Butmir“ godine 1978. dodijeljeno je zemljište za izgradnju vlastitog terena u naselju Doglodi. Radnim akcijama članova i simpatizera Kluba za šest mjeseci izgrađen je nogometni teren, a od septembra 1978. godine Klub utakmice igra na vlastitom terenu.

Tokom agresije na državu BiH Klub je učestvovala na malonogometnim turnirima u Sarajevu. Od marta 1996. godine Klub se vraća u naselje Doglodi na svoje igralište koje je devastirano, svlačionice uništene, sva sportska oprema odnesena, igrački kadar rasut po svim zemljama

Evrope, a iz Upravnog odbora Kluba ostala su samo tri člana Tomislav Grizelj, Tomislav Barić i Alija Nukica koji ponovo nastavljaju sa radom Kluba sa nogometašima sa područja grada Sarajeva. Klub je bio organizator četiri malonogometna božićna turnira u periodu od 1997. do 2001. godine. i prvog međunarodnog malonogometnog turnira na području države BiH na koje su učestvovala ekipe iz FBiH, RS-a, Republike Hrvatske i Republike Srbije.

U okviru kluba radi i nogometna škola koja je dobila ime po legendarnom bosanskohercegovačkom nogometašu Josipu Katalinskom-Škiji i ima 40 aktivnih polaznika.

Ovaj značajni jubilej Kluba obilježiti će se svečanom sjednicom koja će se održati 28. aprila 2014. godine i susretom svih generacija nogometaša Kluba, koji je predviđen za 14. augusta 2014. god.



Na osnovu člana 6. stav (1) Odluke o priznanjima općine Ilidža („Službene novine Kantona Sarajeva“, broj 36/10 i 1/14), Općinsko vijeće Ilidža na 13. redovnoj sjednici održanoj dana 30.01.2014.godine, donosi

ODLUKU

O RASPISIVANJU JAVNOG POZIVA ZA PREDLAGANJE KANDIDATA ZA DODJELU PRIZNANJA OPĆINE ILIDŽA

I

Ovom odlukom Općinsko vijeće Ilidža raspisuje Javni poziv za predlaganje kandidata za dodjelu priznanja Općine Ilidža i to:

- Zlatna plaketa Općine Ilidža
- Srebrna plaketa Općine Ilidža
- Zahvalnica Općine Ilidža

Priznanja Općine Ilidža dodjeljuju se pojedincima i kolektivima sa područja općine Ilidža za izuzetne uspjehe u razvoju privrednih i društvenih djelatnosti, kao i značajan doprinos u odbrani općine.

Izuzetno, priznanja se mogu dodijeliti pojedincima i kolektivima koji nisu sa područja općine Ilidža, ako su njihovi rezultati primjereni ugledu općine.

Priznanja se mogu dodjeljivati i posthumno.

II

Prijedloge za dodjelu priznanja mogu podnositi građani pojedinci, udruženja građana, savjeti mjesnih zajednica, boračke organizacije i udruženja, političke partije, vijećnici Općinskog vijeća Ilidža, općinski načelnik, ustanove i drugi organi i organizacije sa područja općine Ilidža.

III

Kriteriji za dodjelu priznanja su slijedeći:

a) kolektivima koji su u dužem vremenskom periodu:

1. ostvarili izuzetne rezultate u radu;
2. ulagali u proširenje proizvodnih kapaciteta;
3. postigli izuzetne rezultate u oblasti nauke, kulture, prosvjetne djelatnosti, vjerskog života, sporta, zdravstva, bezbjednosti, razvoju komunalne infrastrukture, zaštiti radne i prirodne sredine i razvoju dobrih međuljudskih odnosa;
4. dali izuzetan doprinos u ostvarivanju prava građana;
5. doprinijeli poboljšanju uslova rada i života u MZ na području općine Ilidža;
6. značajno doprinijeli u organizaciji i pripremama za odbranu i odbrani zemlje;
7. dali izuzetan doprinos u drugim područjima života i rada.

b) pojedincima koji su:

1. inovatori na tehničkim i drugim unapređenjima;
2. doveli u opasnost svoj život spašavajući druge osobe i materijalna dobra;
3. kao donatori humano postupali prema pojedincima ili kolektivima;
4. posebno doprinijeli razvoju lokalne samouprave u MZ, općini i poboljšanju uslova života građana;
5. uspješno organizovali organe MZ i udruženja, te doprinijeli njihovom radu;
6. postigli izuzetne rezultate u oblasti poljoprivredne proizvodnje;
7. ostvarili posebne rezultate u sportu, vaspitno-obrazovnom radu, naučnom radu, umjetnosti i kulturi, na međunarodnom, državnom i federalnom nivou;
8. značajno doprinijeli u organizaciji i pripremama za odbranu i odbrani zemlje;
9. dali izuzetan doprinos u drugim područjima života i rada.

IV

Priznanja se ne mogu dodijeliti uposlenicima Općine Ilidža za rezultate ostvarene u obavljanju poslova predviđenih opisom radnog mjesta, vijećnicima Općinskog vijeća Ilidža u vrijeme trajanja mandata i članovima Savjeta mjesnih zajednica u vrijeme trajanja mandata.

Priznanja se ne mogu dodijeliti kolektivima ili pojedincima kojim su ista dodijeljena u posljednjih pet godina.

V

Prijedlozi za dodjelu priznanja općine Ilidža podnose se u pisanoj formi sa obrazloženjem i relevantnom dokumentacijom (kopija diplome, priznanja, uvjerenja, zahvalnica i drugih dokaza) o ispunjavanju uslova sa naznakom za koju vrstu priznanja se podnosi prijedlog.

Svaki prijedlog za dodjelu priznanja mora biti obrazložen i dokumentovan.

Prijedlozi za dodjelu priznanja općine Ilidža u skladu sa navedenim kriterijima iz ovog javnog poziva podnose se do 11.02.2014. godine, neposredno putem Centra za pružanje usluga građanima Općine Ilidža ili poštom na adresu:

Općina Ilidža - Općinsko vijeće - Komisija za saradnju sa drugim općinama, nagrade, priznanja, praznike i obilježavanje značajnih događaja i ličnosti

Ul. Butmirska cesta broj 12, 71210 ILIDŽA
uz naznaku

„Prijava na Javni poziv za predlaganje kandidata za dodjelu priznanja Općine Ilidža”.

VI

Javni poziv objavit će se u dnevnim novinama „Oslobođenje” i WEB stranici Općine Ilidža.

VII

Nepotpune i neblagovremene prijave neće se uzeti u razmatranje.

PREDSJEDAVAJUĆA
Smiljana dr Viteškić